

MALAYSIA
DEWAN RAKYAT
ATURAN URUSAN MESYUARAT

NASKHAH SAHIH/BAHASA MALAYSIA

<http://www.parlimen.gov.my>

HARI KHAMIS, 12 OKTOBER 2023, PUKUL 10.00 PAGI

Bil. 2

WAKTU PERTANYAAN-PERTANYAAN MENTERI

1. PR-1523-MQT2371
Tuan Tan Hong Pin [Bakri] minta **MENTERI LUAR NEGERI** menyatakan langkah-langkah yang diambil oleh Kerajaan Malaysia dalam membantu mangsa di Gaza, Palestin berikutan sekatan oleh Israel terhadap bekalan keperluan asas seperti elektrik, makanan, air dan gas.
2. PR-1523-MQT2367
Datuk Haji Idris bin Haji Ahmad [Bagan Serai] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan akta sedia ada yang mampu dikuatkuasakan kepada negara jiran akibat tindakan mereka yang memberi kesan negatif kepada rakyat Malaysia dalam isu jerebu yang diakibatkan oleh pembakaran terbuka di bahagian Sumatera.
3. PR-1523-MQT2365
Puan Syerleena binti Abdul Rashid [Bukit Bendera] minta **MENTERI SAINS, TEKNOLOGI DAN INOVASI** menyatakan pandangan tentang infrastruktur kritikal yang diperlukan untuk negara membangun dengan mengambil kira matlamat Malaysia untuk menubuhkan tapak pelancaran angkasa lepasnya sendiri. Huraikan langkah-langkah yang ditetapkan bagi memastikan negara mempunyai bilangan graduan yang mencukupi dalam kejuruteraan aeroangkasa dan mekanisme yang mencukupi untuk menjamin pembangunan penerokaan angkasa lepas yang setanding dengan NASA, JASA dan EASA.

MALAYSIA
DEWAN RAKYAT
ATURAN URUSAN MESYUARAT

NASKHAH SAHIH/BAHASA MALAYSIA

<http://www.parlimen.gov.my>

HARI KHAMIS, 12 OKTOBER 2023, PUKUL 10.00 PAGI

Bil. 52

WAKTU PERTANYAAN-PERTANYAAN MENTERI

PERTANYAAN-PERTANYAAN BAGI JAWAB LISAN

1. PR-1523-L22488
Datuk Suhaimi bin Nasir [Libaran] minta **MENTERI PEMBANGUNAN KERAJAAN TEMPATAN** menyatakan apakah terdapat sebarang inisiatif pihak Kementerian bagi membantu golongan penjaja tanpa premis untuk mendapatkan lesen penjaja dan lokasi berniaga.
2. PR-1523-L22287
Dato' Sri Tuan Ibrahim bin Tuan Man [Kubang Kerian] minta **PERDANA MENTERI** menyatakan adakah Kerajaan tidak berhasrat untuk meningkatkan lagi keupayaan JAKIM dengan menambah kakitangan yang berkepakaran, kemudahan serta teknologi terkini dalam mengesan bahan yang digunakan dalam setiap bahan yang diselidiki setelah Persijilan Halal Malaysia telah diterima di peringkat antarabangsa.
3. PR-1523-L22516
Dato' Seri Dr. Wan Azizah Wan Ismail [Bandar Tun Razak] minta **MENTERI KOMUNIKASI DAN DIGITAL** menyatakan langkah penguatkuasaan undang-undang dan kesedaran masyarakat mengenai bahaya Ancaman Siber dimana penjenayah siber menggunakan alatan AI (kecerdasan buatan) untuk menggodam kata laluan, membocorkan maklumat dan menipu pengguna mengakibatkan pelanggaran data dan kerugian kewangan.

4. PR-1523-L22335

Tuan Jamaludin bin Yahya [Pasir Salak] minta **MENTERI PERTAHANAN** menyatakan :

- (a) status terkini pembinaan kapal Littoral Combat Ship (LCS) milik TLDM yang telah terbengkalai sejak sekian lama di Boustead Naval Shipyard, Lumut ; dan
- (b) adakah kerja-kerja pembinaan semula telah mula dijalankan dan bilakah kapal pertama dijangka akan diserahkan kepada TLDM.

5. PR-1523-L21345

Tuan Haji Yusuf bin Abd. Wahab [Tanjong Manis] minta **MENTERI LUAR NEGERI** menyatakan apakah langkah-langkah yang diambil untuk menolak tuntutan negara China yang terkini berhubung kawasan perairan yang bertindih dengan sempadan negara Malaysia, terutamanya di Sarawak.

6. PR-1523-L22386

Dato' Seri Dr. Shahidan bin Kasim [Arau] minta **PERDANA MENTERI** menyatakan garis panduan yang telah ditetapkan bagi penubuhan tabung-tabung bencana bagi memastikan dana daripada tabung-tabung ini tidak disalah guna, dan adakah tabung bencana seperti Tabung Bencana NSTP-Media Prima diaudit oleh pihak-pihak tertentu bagi memastikan kelancaran agihan seperti yang diharapkan oleh para penderma.

7. PR-1523-L21225

Tuan Fong Kui Lun [Bukit Bintang] minta **MENTERI KOMUNIKASI DAN DIGITAL** menyatakan penyertaan dalam sambutan Hari Kebangsaan baru-baru ini yang tidak mencerminkan keseimbangan kepelbagaian kaum dan apakah sebab kegagalan ini.

8. PR-1523-L22392

Tuan Zakri bin Hassan [Kangar] minta **MENTERI PERDAGANGAN DALAM NEGERI DAN KOS SARA HIDUP** menyatakan penjelasan mengapakah bekalan gula bukan premium amat berkurang di Perlis. Adakah hal ini disebabkan penutupan kilang gula Chuping menyebabkan bekalan gula bukan premium tiada di negeri ini.

9. PR-1523-L21807

Tuan Tan Hong Pin [Bakri] minta **MENTERI SAINS, TEKNOLOGI DAN INOVASI** menyatakan bilakah Ruang Daya Cipta (RDC) akan ditubuhkan di daerah Muar seperti yang dinyatakan pada sesi penggulungan perbahasan jawatankuasa Belanjawan 2023.

10. PR-1523-L22122
Tuan Ahmad Fadhli bin Shaari [Pasir Mas] minta **MENTERI BELIA DAN SUKAN** menyatakan perkembangan proses kerja-kerja naik taraf Mini Stadium Pasir Mas seperti yang telah diluluskan oleh Kerajaan terdahulu.
11. PR-1523-L21632
Tuan Syed Ibrahim bin Syed Noh [Ledang] minta **MENTERI KOMUNIKASI DAN DIGITAL** menyatakan langkah yang diambil oleh pihak Kementerian dan agensi berkaitan bagi mengukuhkan peranan pengamal media dalam menyampaikan informasi sahih dan berwibawa.
12. PR-1523-L22584
Datuk Dr. Nik Muhammad Zawawi bin Haji Salleh [Pasir Puteh] minta **MENTERI PEMBANGUNAN KERAJAAN TEMPATAN** menyatakan bentuk pemantauan atau kawalan yang dibuat pihak berkuasa tempatan (PBT) ke atas isu lambakan warga asing yang menjalankan perniagaan di premis atau menjadi penjaja serta dilihat menguasai ekonomi setempat.
13. PR-1523-L22156
Datuk Larry Soon @ Larry Sng Wei Shien [Julau] minta **MENTERI LUAR NEGERI** menyatakan apakah pendirian dan tindakan diplomatik yang akan diambil oleh Wisma Putra sebagai tindak balas tegas terhadap tuntutan negara China yang cuba untuk menguasai Zon Ekonomi Eksklusif (ZEE) milik Malaysia berhampiran perairan Sabah dan Sarawak sepertimana menurut Peta Standard China 2023 yang dikeluarkan oleh Kementerian Sumber Asli negara mereka baru-baru ini.
14. PR-1523-L22591
Tuan Mohd Nazri bin Abu Hassan [Merbok] minta **MENTERI KOMUNIKASI DAN DIGITAL** menyatakan :
 - (a) bilakah Starlink diberikan lesen *Network Service Provider* (NSP) dan lesen *Network Facility Provider* (NFP) dari SKMM; dan
 - (b) syarikat manakah yang mendapat kontrak pemasangan dan bilakah tender dilaksanakan dan mengapa perkhidmatan MEASAT *ConnectMe Now* yang sedia ada tidak digunakan.

15. PR-1523-L22070

Datuk Andi Muhammad Suryady bin Bandy [Kalabakan] minta **MENTERI PERDAGANGAN DALAM NEGERI DAN KOS SARA HIDUP** menyatakan apakah mekanisme dan persiapan awal yang direncana untuk mengurangkan kesan kos sara hidup rakyat apatah lagi adanya cadangan dan kemungkinan untuk pelaksanaan semula cukai GST pada masa hadapan.

16. PR-1523-L22075

Dato' Hajah Mumtaz binti Md Nawawi [Tumpat] minta **MENTERI LUAR NEGERI** menyatakan sama ada Kerajaan telah melaksanakan sebarang kajian secara mendalam dan mempunyai dasar dan hala tuju jelas untuk menyertai atau tidak menyertai pakatan BRICS dengan mengambil kira kesan terhadap hubungan diplomatik dengan negara-negara bukan BRICS.

17. PR-1523-L21771

Tuan Zahir bin Hassan [Wangsa Maju] minta **MENTERI PEMBANGUNAN KERAJAAN TEMPATAN** menyatakan :

- (a) inisiatif Kementerian untuk memastikan landskap dikawal selia mengikut spesifikasi dan garis panduan sedia ada; dan
- (b) adakah Kementerian merancang untuk merangka dan menggubal satu akta bagi mengawal dan memberi kuasa undang-undang (*legal effect*) bagi dasar dan garis panduan tersebut.

18. PR-1523-L21994

Datuk Haji Idris bin Haji Ahmad [Bagan Serai] minta **MENTERI KOMUNIKASI DAN DIGITAL** menyatakan tindakan pihak Kementerian dalam membanteras impak daripada kewujudan aplikasi songsang dalam talian yang sehingga kini dikesan sebanyak 11 aplikasi telah wujud sehingga memudahkan golongan LGBT melakukan aktiviti mereka terutama yang melibatkan kalangan remaja dan memberi kesan buruk kepada keluarga mereka.

19. PR-1523-L21496

Puan Wong Shu Qi [Kluang] minta **PERDANA MENTERI** menyatakan sejauh mana Parlimen akan benar- benar menjadi institusi perundangan yang bebas daripada Kerajaan/Eksekutif seperti di negara-negara luar terutamanya Komanwel melalui Akta Perkhidmatan Parlimen (PSA).

20. PR-1523-L22683
Dato' Azman bin Nasrudin [Padang Serai] minta **MENTERI PEMBANGUNAN KERAJAAN TEMPATAN** menyatakan isu rumah-rumah rosak di taman perumahan yang memerlukan bantuan pembaikan. Dimaklumkan KPKT menyediakan peruntukan untuk membaiki rumah-rumah yang rosak dan dianggarkan menyediakan jumlah pembaikan sebuah rumah sehingga RM13,000. Adakah KPKT bercadang untuk menambah jumlah peruntukan memandangkan kos yang semakin meningkat dan berapa lamakah proses permohonan sesebuah rumah untuk pembaikan.
21. PR-1523-L21317
Tuan Lim Lip Eng [Kepong] minta **PERDANA MENTERI** menyatakan sebab-sebab tiada tindakan undang-undang ke atas bekas Pengarah Jabatan Siasatan Jenayah Bukit Aman, Datuk Seri Wan Ahmad Najmuddin Mohd tentang kes pelucutan A\$320,000 wangnya oleh Pasukan Polis Australia (AFP) pada tahun 2018.
22. PR-1523-L22527
Datuk Haji Ahmad Marzuk bin Shaary [Pengkalan Chepa] minta **PERDANA MENTERI** menyatakan cadangan untuk mewujudkan undang-undang yang menghalang apa-apa perhimpunan, program terbuka atau tertutup, program berbentuk hiburan dan badan NGO yang mempromosikan LGBT.
23. PR-1523-L22489
Datuk Suhaimi bin Nasir [Libaran] minta **MENTERI BELIA DAN SUKAN** menyatakan adakah terdapat sebarang perancangan oleh pihak Kementerian untuk memajukan tapak tanah di kawasan Hub Pendidikan Sandakan dengan mewujudkan satu pusat belia, pusat sukan dan litar lumba bagi golongan muda mengadakan aktiviti sosial.
24. PR-1523-L21902
Tuan Kalam bin Salan [Sabak Bernam] minta **PERDANA MENTERI** menyatakan garis masa, cabaran, pelaksanaan dan cadangan bagi mengatasi sebarang kelengahan pengubalan Akta Kebebasan Maklumat (FOI).
25. PR-1523-L21612
Dr. Mohammed Taufiq bin Johari [Sungai Petani] minta **MENTERI BELIA DAN SUKAN** menyatakan keberkesanan Program Rakan Muda serta maklum balas peserta daripada program tersebut.

26. PR-1523-L22475

Tuan Sabri bin Azit [Jerai] minta **PERDANA MENTERI** menyatakan langkah berkenaan gesaan Majlis Kebangsaan Bagi Hal Ehwal Agama Islam Malaysia (MKI) bagi pembentukan jawatankuasa khas kajian yang terdiri daripada golongan pakar dan pengamal undang-undang yang berkelayakan.

27. PR-1523-L21861

Tuan Manndzri bin Nasib [Tenggara] minta **MENTERI BELIA DAN SUKAN** menyatakan adakah terdapat sebarang kajian impak terhadap pembangunan sukan permotoran negara dikalangan belia khususnya dalam mengatasi masalah lumba haram dilaksana setelah pihak Kerajaan mengambil keputusan untuk tidak meneruskan pembinaan litar Drag di setiap negeri.

28. PR-1523-L22342

Dr. Ahmad Fakhruddin bin Fakhruddin [Kuala Kedah] minta **PERDANA MENTERI** menyatakan langkah-langkah yang diambil untuk meningkatkan mutu pengajaran dan pembelajaran berasaskan ruang lingkup STEM di Sekolah-sekolah Agama Rendah dan Menengah.

29. PR-1523-L21443

Dato' Haji Shamsul Kahar bin Mohd Deli [Jempol] minta **MENTERI BELIA DAN SUKAN** menyatakan apakah usaha *reform* Kementerian membangunkan program sukan rentetan Malaysia mencatatkan pencapaian terburuk dalam sejarah Sukan SEA 2023 (Kemboja) dengan menduduki tempat ketujuh dan gagal mencapai sasaran 40 pingat emas yang ditetapkan.

30. PR-1523-L22674

Dato' Wira Dr. Ku Abd Rahman bin Ku Ismail [Kubang Pasu] minta **MENTERI BELIA DAN SUKAN** menyatakan sebab-sebab 70% daripada 6361 calon yang ditawarkan dimasukkan ke Institusi Latihan Kemahiran Belia dan Sukan (ILKBS) menolak melanjutkan pelajaran dalam Pendidikan Teknikal dan Latihan Vokasional (TVET). Juga apakah tindakan Kerajaan bagi menangani isu ini.

31. PR-1523-L21158
Tuan Tan Kok Wai [Cheras] minta **MENTERI PEMBANGUNAN KERAJAAN TEMPATAN** menyatakan sama ada Akta Perancangan Bandar dan Desa akan dikaji semula untuk memperbaiki sebarang kelemahan dalam peraturan dan garis panduan yang mengawal selia pembangunan di kawasan cerun, tanah tinggi dan kawasan alam sekitar sensitif (ESA) serta nyatakan kriteria di mana pembangunan dalam kawasan ESA perlu dirujuk terlebih dahulu kepada Majlis Perancangan Fizikal Kebangsaan.
32. PR-1523-L22374
Dato' Seri Dr. Shahidan bin Kasim [Arau] minta **MENTERI PEMBANGUNAN KERAJAAN TEMPATAN** menyatakan penjelasan berkaitan *trend* permohonan pertukaran status tanah daripada pertanian kepada pembangunan yang sangat memberi kesan kepada industri pertanian sekali gus memberi impak negatif kepada keterjaminan makanan negara. Mengikut pemantauan pihak berkuasa tempatan dan PLANMalaysia, sehingga hari ini, berapa statistik tanah pertanian seperti sawah padi, tanaman kontan serta tanah kelapa sawit yang telah ditukar status kepada pembangunan.
33. PR-1523-L21161
Tuan Tan Kok Wai [Cheras] minta **MENTERI SAINS, TEKNOLOGI DAN INOVASI** menyatakan status penglibatan Malaysia dalam penubuhan organisasi *International Lunar Research Station* dan sama ada Malaysia akan menyertai program Artemis.
34. PR-1523-L22196
Tuan Mohd Syahir bin Che Sulaiman [Bachok] minta **PERDANA MENTERI** menyatakan komitmen Kerajaan Persekutuan untuk menyemak dan menyeragamkan akta-akta Parlimen yang berkaitan dengan pemilikan dan pembangunan sumber hidrokarbon, khususnya terhadap tafsiran hak negeri, sempadan luar pesisir (*offshore*) bagi negeri yang berhadapan dengan medan pengeluaran minyak, serta ketelusan pengiraan dan pembayaran royalti kepada negeri pengeluar minyak.
35. PR-1523-L21677
Tuan Haji Muhammad Islahuddin bin Abas [Mersing] minta **MENTERI PEMBANGUNAN KERAJAAN TEMPATAN** menyatakan pendirian Kerajaan terhadap cadangan untuk melaksanakan pengurusan Sisa Buangan Kepada Tenaga (WTE) yang berpotensi mengurangkan kadar pelupusan sampah di Malaysia.

36. PR-1523-L21567

Puan Teresa Kok Suh Sim [Seputeh] minta **MENTERI PEMBANGUNAN KERAJAAN TEMPATAN** menyatakan sama ada Kementerian akan melanjutkan konsesi dengan Alam Flora selepas konsesi berakhir pada tahun 2025. Apakah langkah-langkah yang akan diambil oleh Kementerian untuk menambah baik pengutipan sisa pepejal di Semenanjung Malaysia.

37. PR-1523-L21949

Dato' Sri Saifuddin Abdullah [Indera Mahkota] minta **MENTERI KOMUNIKASI DAN DIGITAL** menyatakan sejauh manakah kedudukan daya saing Malaysia dalam perlumbaan teknologi digital dunia pada hari ini dan apakah fasilitasi yang disediakan oleh Kerajaan kepada bakat dan teknologis tempatan, termasuk melahirkan ikon-ikon teknologi digital yang bertaraf dunia.

38. PR-1523-L22138

Tuan Ganabatirau A/L Veraman [Klang] minta **PERDANA MENTERI** menyatakan apakah langkah-langkah yang diambil untuk meningkatkan penglibatan golongan bukan Bumiputera di perkhidmatan awam agar ia mencerminkan demografi kaum di Malaysia.

39. PR-1523-L22173

Tuan Wan Razali bin Wan Nor [Kuantan] minta **MENTERI PEMBANGUNAN KERAJAAN TEMPATAN** menyatakan bilangan projek perumahan yang lewat siap bagi tempoh 2018-2022:

- (a) berapa bilangan pembeli yang dibayar ganti rugi LAD; dan
- (b) berapa peratus kes yang dibawa ke Tribunal Tuntutan Pembeli Rumah (TTPR) berjaya diselesaikan.

40. PR-1523-L22106

Tuan Ahmad Fadhli bin Shaari [Pasir Mas] minta **PERDANA MENTERI** menyatakan sama ada Kerajaan Persekutuan akan menubuhkan Pejabat Belanjawan Parlimen (PBO) yang menyediakan khidmat bebas secara objektif kepada semua ahli Parlimen merentasi parti berkenaan anggaran implikasi kewangan atau kos, dasar dan cadangan dasar mereka seperti tertera dalam Manifesto Pakatan Harapan sebelum ini.

41. PR-1523-L21933

Dato' Haji Mohd Suhaimi bin Abdullah [Langkawi] minta **MENTERI PERDAGANGAN DALAM NEGERI DAN KOS SARA HIDUP** menyatakan peranan dan usaha Suruhanjaya Persaingan Malaysia (MyCC) terhadap kartel dan monopoli dalam sektor makanan dan pertanian, termasuk tindakan yang telah diambil dan adakah Kerajaan membuat pindaan terhadap Akta Persaingan 2010 dan Akta Suruhanjaya Persaingan 2010.

42. PR-1523-L22104

Dato' Seri Hamzah bin Zainudin [Larut] minta **PERDANA MENTERI** menyatakan :

- (a) mengapa setelah lebih 10 bulan Kerajaan PH-BN memerintah, pelaku skandal Kapal LCS TLDM masih juga belum didakwa walaupun siasatan PAC dan SPRM jelas memperlihatkan berlaku pelanggaran tatakelola serta penyelewengan; dan
- (b) bukti apakah lagi yang Kerajaan PH-BN perlukan bagi membolehkan pelaku utama disebalik skandal ini dihadapkan ke mahkamah.

43. PR-1523-L21702

Tan Sri Dato' Haji Mahiaddin bin Haji Mohd. Yassin [Pagoh] minta **MENTERI LUAR NEGERI** menyatakan butiran spesifik mengenai perjanjian persempadanan maritim yang di tandatangan oleh YAB Perdana Menteri pada bulan Jun 2023 sempena lawatan kerja Presiden Indonesia ke Malaysia, serta apakah respons Kerajaan terhadap kesediaan Indonesia untuk meneroka kawasan perairan Ambalat seperti yang dilaporkan oleh media asing.

44. PR-1523-L21965

Tuan Haji Wan Hassan bin Mohd Ramli [Dungun] minta **MENTERI LUAR NEGERI** menyatakan perkembangan terkini berkaitan isu tuntutan di Blok Ambalat yang kaya dengan minyak mentah dan gas asli oleh Indonesia.

45. PR-1523-L22601

Tuan Wan Ahmad Fayhsal bin Wan Ahmad Kamal [Machang] minta **MENTERI PERTAHANAN** menyatakan rancangan jangka masa pendek dan panjang pihak Kerajaan Persekutuan kepada langkah penyelesaian penjualan aset di bawah Lembaga Tabung Angkatan Tentera (LTAT) iaitu Boustead Plantations Berhad serta aset lain jika ada.

46. PR-1523-L(5)00184

Datuk Seri Dr. Ronald Kiandee [Beluran] minta **MENTERI LUAR NEGERI** menyatakan berdasarkan temu bual YAB. Perdana Menteri bersama CNN pada 23 September 2023, apakah jaminan yang diberikan oleh Premier China, Li Qiang dalam pertikaian sempadan Laut China Selatan dalam menyelesaikan isu pertikaian ini dan apakah bentuk rundingan atau tuntutan oleh pihak China bagi membolehkan mereka menyelesaikan isu pertikaian ini dengan segera.

[Pertanyaan di bawah PM 22(5)]

47. PR-1523-L21125

Dato' Sri Dr. Wee Jeck Seng [Tanjung Piai] minta **MENTERI PEMBANGUNAN KERAJAAN TEMPATAN** menyatakan adakah Kerajaan bersedia untuk memperkenalkan cukai kekosongan (*vacancy tax*) bagi mengatasi isu lambakan rumah tidak terjual di Malaysia.

ATURAN URUSAN MESYUARAT DAN USUL-USUL

1. (D.R. 27/2023) Rang Undang-Undang Suruhanjaya Perkhidmatan Air Negara (Pindaan) 2023. **Bacaan Kali Yang Kedua**

[Kementerian Sumber Asli, Alam Sekitar dan Perubahan Iklim]

2. (D.R. 33/2023) Rang Undang-Undang Syarikat (Pindaan) 2023. “

[Menteri Perdagangan Dalam Negeri dan Kos Sara Hidup]

3. (D.R. 25/2023) Rang Undang-Undang Kawalan Produk Merokok Demi Kesihatan Awam 2023 – **Bacaan Kali Yang Kedua**

Dan;

Pengerusi Jawatankuasa Pilihan Khas Kesihatan oleh Yang Berhormat Datuk Seri Dr. Dzulkefly bin Ahmad, Ahli Parlimen Kuala Selangor akan mencadangkan :

“**BAHAWA** Penyata yang disediakan oleh Jawatankuasa Pilihan Khas Kesihatan untuk mengkaji Rang Undang-Undang Kawalan Produk Merokok Demi Kesihatan Awam 2023, yang dibentangkan dalam Majlis ini sebagai Kertas DR. 8 Tahun 2023 diperkenankan mengikut Peraturan Mesyuarat 60”.

4. (D.R. 26/2023) Rang Undang-Undang Makanan (Pindaan) 2023. **Bacaan Kali Yang Kedua**

[Menteri Kesihatan]

5. PR-1523-U(27)278
Datuk Seri Ir. Dr. Wee Ka Siong [Ayer Hitam] akan mencadangkan :

"Bahawa Dewan Rakyat ini menggesa Kerajaan untuk segera menangani isu gangguan bekalan beras putih tempatan (BPT) di pasaran yang kian meruncing susulan tindakan India menghentikan eksport beras putihnya ke pasaran.

Langkah penetapan had pembelian maksimum 100kg BPT untuk setiap individu dan syarikat bermula 7 September 2023 hanyalah penyelesaian yang bersifat sementara dan Kerajaan seharusnya mula merangka satu pelan yang lebih tuntas dalam usaha menjamin keterjaminan bekalan beras di Malaysia bagi jangka masa yang panjang.

Kerajaan perlu segera mewujudkan rangka tindakan yang lebih komprehensif bagi mengurangkan impak inflasi makanan global dari terus menghimpit rakyat negara ini khususnya berkaitan beras yang menjadi makanan ruji kita semua."

[Menteri Pertanian dan Keterjaminan Makanan]

6. PR-1523-U(27)279

Datuk Seri Ir. Dr. Wee Ka Siong [Ayer Hitam] akan mencadangkan :

"Bahawa Dewan Rakyat ini menggesa Kerajaan mencari penyelesaian untuk mengurangkan kos pengambilan pekerja asing yang kian melambung tinggi. Kebergantungan majikan tempatan terhadap pekerja asing berbanding pekerja tempatan di negara ini bukanlah perkara asing terutama dalam sektor 3D (*dirty, dangerous and difficult*).

Maka, adalah penting untuk mewujudkan satu dasar yang lebih komprehensif bagi mengurangkan kebergantungan terhadap pekerja asing agar pekerja tempatan diberi keutamaan terlebih dahulu dengan reformasi terhadap ekosistem sektor 3D meliputi kadar gaji, faedah dan sebagainya yang berpadanan dengan risiko pekerjaan perlu diimplementasikan secara berseiringan."

[Menteri Dalam Negeri]

7. PR-1523-U(27)280

Datuk Seri Ir. Dr. Wee Ka Siong [Ayer Hitam] akan mencadangkan :

"Bahawa Dewan Rakyat ini menggesa Kerajaan untuk mewujudkan satu dasar mengutamakan sajian menu buah-buahan tempatan di semua majlis rasmi Kerajaan sebagai galakan dan sokongan kepada pemain industri buah-buahan tempatan serta ke arah membudayakan amalan pemakanan sihat.

Adalah menjadi tanggungjawab Kementerian bagi membantu pengusaha buah-buahan tempatan untuk memasarkan serta mempromosi hasil ladang mereka dan sekali gus meningkatkan pendapatan. Maka melalui sajian menu buah-buahan di kesemua majlis rasmi Kerajaan perlu dibudayakan sepenuhnya sebagai sokongan terhadap industri buah-buahan tempatan.

[Menteri Pertanian dan Keterjaminan Makanan]

8. PR-1523-U(27)281

Dato' Indera Mohd Shahar bin Abdullah [Paya Besar] akan mencadangkan :

"Bahawa Dewan Rakyat menggesa Kerajaan untuk membentangkan perancangan jangka masa panjang yang menyeluruh dalam memastikan Jumlah Kadar Kesuburan (Total Fertility Rate) bagi rakyat Malaysia terus meningkat.

Negara kita telah beralih ke status negara menua pada tahun 2021. Hal Ini kerana peratusan penduduk berusia 65 tahun dan ke atas telah mencapai 7% daripada jumlah populasi. Trend ini menunjukkan peningkatan dalam dua tahun lalu pada kadar 0.2 peratus setahun di mana pada tahun 2022 sebanyak 7.2% dan dijangka pada tahun 2023 mencapai 7.4%.

Dalam tempoh dua dekad lagi, negara dijangka beralih kepada negara tua apabila kohort umur yang sama mencapai 14% daripada jumlah populasi. Peralihan ini tentunya memberikan kesan yang paling ketara iaitu kepada penurunan trend populasi pekerja dan produktiviti. Bagi menghadapi cabaran dan dampak negara menua, kita perlu mencari jalan memperlahankan proses penuaan ini. Proses penuaan ini tidak boleh dihalang atau diberhentikan tetapi kita perlu mempunyai pelan persediaan bagi menghadapi situasi tersebut.

Jika kita teliti jumlah peratusan struktur umur penduduk yang berumur 0-14 tahun berlaku penurunan pada kadar 0.4% bagi 3 tahun iaitu ; tahun 2020 sebanyak 24%, 2021 sebanyak 23.6%, 2022 sebanyak 23.2%, dan 2023 sebanyak 22.6%.

Umum mengetahui negara-negara jiran dan serantau juga menghadapi perkara penurunan bagi jumlah kadar kesuburan, tetapi kadar tersebut agak perlahan penurunannya. Sehubungan itu, objektif kita agar dapat melandaikan graf penurunan ini bagi negara kita.

Persoalan saya, apakah kemampuan hospital Kerajaan dalam meningkatkan kemampuan kesihatan reproduktif. Berapa jumlah Hospital yang menyediakan perkhidmatan IUI dan IVF. Berapa ramai doktor pakar reproduktif masih berkhidmat di hospital Kerajaan. Adakah harga perkhidmatan yang dikenakan mampu diakses oleh rakyat. Berapa jumlah makmal reproduktif.

Dewan Rakyat juga perlu mencadangkan agar Kerajaan menetapkan polisi yang mampan seperti fleksibel waktu bekerja, yuran pusat penjagaan kanak yang mampu bayar, perbanyakkan pusat asuhan ditempat kerja, dan *paternity leave* kepada ibu bapa yang bekerja untuk meringankan bebanan mereka dalam meningkatkan kadar reproduktif rakyat Malaysia. *Population Complexity* ini yang harus kita uruskan dengan penuh keberanian dan semua pihak kena bersama-sama."

[Menteri Pembangunan Wanita, Keluarga dan Masyarakat]

9. PR-1523-U(27)283

Dato' Indera Mohd Shahar bin Abdullah [Paya Besar] akan mencadangkan :

"Bahawa Dewan Rakyat menggesa Kerajaan untuk membentangkan sebuah Kertas Putih Imigresen yang membincangkan tentang kadar atau jumlah sebenar kemasukan pelawat asing ke negara Malaysia.

Perkara ini bertujuan untuk mengetahui pergerakan pelawat asing berkenaan sama ada mereka terus tinggal di Malaysia atau dalam satu tempoh tertentu. Menerusi ini kita akan mengetahui jumlah sebenar populasi rakyat di negara ini melalui pengenalan perbezaan antara jumlah Warganegara Malaysia, Jumlah Pelawat Asing yang masuk ke negara kita sebagai pekerja ataupun dengan tujuan melancong.

Hal ini, akan memudahkan Kerajaan untuk merangka dan melaksanakan pelbagai pelan inisiatif mahupun bantuan seperti subsidi bersasar dan lain-lain agar setiap pelaksanaan tersebut dinikmati oleh rakyat di negara kita."

[Menteri Dalam Negeri]

10. PR-1523-U(27)286

Datuk Seri Panglima Madius Tangau [Tuaran] akan mencadangkan :

"Bahawa Dewan ini menerima hakikat bahawa lebih 100,000 calon peperiksaan SPM pada tahun 2022 telah gagal dalam mata pelajaran dan sekaligus gagal mendapat Sijil Pelajaran Malaysia (SPM).

Menerima hakikat juga bahawa kegagalan dalam peperiksaan SPM ini mengakibatkan masa depan yang gelap kepada calon pada purata 70 ribu hingga 100 ribu setahun.

Menerima hakikat bahawa pelajar tercicir ini tidak ada lagi ruang untuk melanjutkan pelajaran maka segolongan pelajar tercicir ini akan menjadi kerugian dalam sumber tenaga kerja negara.

Dan menerima hakikat bahawa matlamat mendidik sebuah generasi pelajar untuk membina dan membangun negara kita telah gagal maka Kerajaan hendaklah mengambil tindakan yang serius terhadap masalah ini.

Maka dengan itu Dewan Yang Mulia ini hendaklah membuat ketetapan agar silibus dan buku-buku teks Subjek Sejarah Tingkatan Satu, Dua, Tiga, Empat dan Tingkatan Lima hendaklah dikaji semula dan sebuah Jawatankuasa Pilihan Khas Parlimen hendaklah ditubuhkan untuk mendapat pandangan daripada setiap lapisan masyarakat daripada seluruh pelusuk negara, dan pada masa yang sama Jemaah Kabinet hendaklah menubuhkan sebuah Jawatankuasa Kabinet Kajian Semula Silibus dan Buku Teks Sejarah yang dianggotai oleh Menteri-Menteri yang mewakili Sabah, Sarawak, Persekutuan Tanah Melayu dan parti-parti politik yang menubuhkan Kerajaan Perpaduan."

[Menteri Pendidikan]

11. PR-1523-U(27)287

Datuk Seri Panglima Madius Tangau [Tuan] akan mencadangkan :

"Bahawa Dewan ini Menerima hakikat bahawa sebuah Suruhanjaya Siasatan DiRaja yang ditubuhkan oleh Kerajaan suatu ketika dahulu telah berjaya membuat siasatan dan seterusnya telah dibentangkan di Dewan Yang Mulia ini.

Dan menerima hakikat bahawa setelah sekian lama laporan tersebut telah gagal dilaksanakan dan mengakibatkan ketidakpuasan hati sebahagian besar daripada rakyat Malaysia.

Menerima hakikat juga bahawa rakyat tertanya-tanya apakah yang telah terjadi dengan laporan Suruhanjaya Siasatan DiRaja tersebut.

Dan menerima hakikat bahawa kecelaruan urus tadbir Pendatang Tanpa Izin; Penduduk Asing di Sabah yang mempunyai Kad Pengenalan yang meragukan; Peningkatan Bilangan penduduk di Sabah Tanpa Kewarganegaraan ataupun *stateless children* dan kehadiran orang asing yang memegang dokumen IMM13 yang tidak ada halatuju.

Maka Dewan Yang Mulia ini hendaklah membuat ketetapan bahawa sebuah Jawatankuasa Pilihan Khas Parlimen untuk meneliti dan mengkaji semula rekomendasi dan perakuan Laporan Suruhanjaya Siasatan DiRaja Mengenai Pendatang Asing Tanpa Izin untuk merumuskan suatu Road Map penyelesaian tuntas terhadap masalah oleh empat kategori penduduk golongan pendatang asing di Sabah."

[Menteri Dalam Negeri]

12. PR-1523-U(27)290

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa supaya Kerajaan meletakkan sebuah garis panduan untuk sekolah-sekolah bagi pengurusan dana, perbelanjaan, dan juga aktiviti kutipan wang daripada pelajar, ibu-bapa, dan orang ramai. Selain itu, sebuah badan pemantau perlu diwujudkan bagi memastikan garis panduan ini dipatuhi. Ini kerana, kini sudah menjadi sebuah kelaziman untuk pihak-pihak sekolah menganjurkan program-program dan majlis-majlis yang memakan belanja besar, yang menggunakan duit daripada poket pelajar. Sebahagian daripada majlis ini mewajibkan kehadiran, dan sebahagian lainnya adalah secara sukarela. Tetapi harus kita faham, kewujudan jurang ekonomi akan membuatkan wujudnya golongan pelajar yang rasa keciciran sosial disebabkan faktor kewangan keluarga. Ia juga membuat mereka berasa tertekan serta memberi tekanan kepada ibu-bapa, lebih-lebih lagi dalam situasi ekonomi kini. Bukan sahaja untuk majlis, malah sering juga pihak sekolah membuat kutipan wajib bagi pembaharuan infrastruktur, dan kutipan ini kadangkala boleh mencecah ratusan ringgit. Isu ini merupakan sebuah isu yang kurang mendapat perhatian tetapi penting untuk dibawa ke hadapan kerana ia melibatkan sosioekonomi keluarga B40 dan M40 serta kesejahteraan perkembangan minda dan emosi para pelajar yang bakal menjadi teraju negara ini di masa hadapan. Selain itu, dibimbangi jika tiada pemantauan dilakukan, perkara ini akan membuka ruang untuk pihak tertentu mengambil kesempatan."

[Menteri Pendidikan]

13. PR-1523-U(27)291

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa supaya Kerajaan mengambil langkah pro-aktif dalam menangani serta menghentikan kes jenayah dera kanak-kanak di negara ini. Menteri Dalam Negeri pada 14 Mac 2023 melaporkan bahawa terdapat 220 kes kanak-kanak mati akibat penderaan antara tahun 2018 hingga 2022. Data Kementerian Pembangunan Wanita, Keluarga dan Masyarakat antara Januari hingga Jun 2022 juga mendedahkan terdapat 1,055 kes penderaan kanak-kanak di negara ini. Kanak-kanak adalah masa depan negara. Lantaran itu, pihak kerajaan wajar menangani lantas menghentikan kitaran dera ini dengan sebuah target 'Dera Sifar' menerusi langkah-langkah pro-aktif seperti mewajibkan kursus penjagaan anak, mewujudkan sistem pemantauan berkala, meneliti semula undang-undang serta garis panduan berkenaan penjagaan kanak-kanak, meningkatkan kesedaran masyarakat, dan lain-lain."

[Menteri Dalam Negeri]

14. PR-1523-U(27)292

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat menggesa Kerajaan mengambil tindakan yang lebih pro-aktif dan efisien bagi meningkatkan kesedaran, tindak balas, dan kerjasama masyarakat dalam menghadapi bencana alam. Kerajaan telah mengumumkan penubuhan Pusat Bencana Geologi Negara pada akhir tahun ini serta pembangunan Sistem Amaran Awal Tanah Runtuh (SAATR). Inisiatif ini akan dapat meningkatkan kecekapan tindak balas bencana agensi-agensi berkaitan. Bagaimana pula dengan tindak balas masyarakat.

Apa yang telah dan sedang Kerajaan usahakan bagi memastikan rakyat bukan sahaja peka tetapi takut dan patuh kepada arahan yang dikeluarkan oleh pihak berkuasa. Kerajaan perlu menguatkuasakan Akta Pertahanan Awam 1951, Akta 221 bawah seksyen 4 (C) di mana tindakan boleh diambil ke atas mereka yang tidak patuh kepada arahan pihak berkuasa contohnya arahan untuk berpindah dalam situasi banjir yang boleh membahayakan penduduk dan pada masa yang sama memberi risiko kepada penyelamat."

[Perdana Menteri]

15. PR-1523-U(27)293

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa supaya Kerajaan menubuhkan badan siasatan bebas bagi mengenal pasti secara terperinci punca utama yang menyebabkan kekurangan bekalan makanan seperti beras tempatan, ayam dan telur ayam di pasaran serta merangka perancangan penyelesaian jangka pendek dan panjang yang komprehensif termasuk penguatkuasaan terhadap golongan kartel orang tengah serta menambahkan daya pengeluaran bekalan makanan. Rakyat baik dari kalangan pengguna mahupun pengusaha restoran kecil masih mengeluh dengan permasalahan ini yang menyebabkan kenaikan harga bekalan makanan. Kerajaan tidak seharusnya melepaskan tanggungjawab menjaga keterjaminan bekalan makanan kepada individu (sebagai *end user*) mahupun menyarankan penyelesaian jalan mudah seperti menambah import makanan tetapi mencari penyelesaian sepanjang rangkaian jaringan bekalan bahan makanan mentah."

[Menteri Pertanian dan Keterjaminan Makanan]

16. PR-1523-U(27)294

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya mewujudkan pusat benih padi khusus di kawasan utara khususnya di Arau, Perlis bagi membekalkan benih-benih padi yang bermutu tinggi dan membolehkan penyelidikan yang agresif dibuat bagi menghasilkan benih padi baru di samping menyelesaikan masalah ketidakcukupan benih padi di pasaran. Pusat Benih Padi adalah penting untuk mengumpul benih padi yang lebih berdaya komersial, lebih berdaya tahan iklim (*climate resistant*) dan sesuai dengan cuaca di kawasan utara Semenanjung Malaysia. Pusat ini juga boleh berperanan menjalankan kajian di peringkat serantau dan melibatkan penyelidik daripada negara-negara jiran seperti Thailand, Indonesia dan Myanmar yang mempunyai tanaman baka padi yang berdaya komersial tinggi."

[Menteri Pertanian dan Keterjaminan Makanan]

17. PR-1523-U(27)295

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya mengkaji semula peruntukan khas yang boleh diberikan kepada pekebun kecil, penternak dan nelayan yang terjejas akibat situasi iklim yang tidak menentu serta kenaikan harga barang. Kerosakan tanaman dan kematian ternakan seringkali mendatangkan kerugian besar hingga kepada jutaan ringgit setiap kali berlaku bencana alam. Dengan situasi semasa ekonomi negara yang tidak stabil juga secara tidak langsung akan memberi tekanan kepada kos sara hidup pekebun kecil, penternak dan nelayan yang kebanyakannya bergantung harap kepada sumber pendapatan tersebut sahaja. Maka pemberian peruntukan khas ini dapat menambah baik kehidupan mereka."

[Menteri Pertanian dan Keterjaminan Makanan]

18. PR-1523-U(27)296

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya menyegerakan pembinaan dan baik pulih tembok sempadan Malaysia-Thailand supaya merangkumi keseluruhan perbatasan dari Perlis hingga Kelantan dan menyediakan suatu pelan tindakan komprehensif merangkumi semua agensi Kerajaan bagi kawalan sempadan Malaysia-Thailand. Sempadan Malaysia-Thailand adalah sepanjang kira-kira 656km namun hanya 111 km sahaja yang berpagar. Sebahagian tembok sempadan antara Malaysia dan Thailand di sepanjang Laluan Keselamatan dan Pembangunan (KESBAN) dilihat sudah usang manakala peralatan kamera litar tertutup (CCTV) dan alat pengimbas

perlu ditambah, dibaik pulih dan dinaik taraf dengan teknologi terkini seperti penggunaan dron. Beberapa insiden pada masa lalu seperti kes tembakan ke atas pasukan keselamatan negara dan bermaharajalelanya sindiket pemerdagangan manusia seperti yang berlaku di insiden Wang Kelian serta penyeludupan barangan termasuk dadah dan senjata menunjukkan betapa kritikalnya keperluan untuk meningkatkan tahap keselamatan di perbatasan. Kerajaan Malaysia sebelum ini telah memberikan komitmen untuk membina tembok sempadan tersebut tetapi sehingga terkini masih tiada pelan pembangunan komprehensif dan terperinci yang diumumkan. Mohon pihak kerajaan memandang serius perkara ini dengan menyegerakan pembangunan tembok sempadan Malaysia-Thailand secara menyeluruh dan memastikan suatu pelan komprehensif merangkumi semua agensi Kerajaan bagi kawalan sempadan Malaysia-Thailand agar benar-benar berkesan menjamin keselamatan perbatasan negara."

[Perdana Menteri]

19. PR-1523-U(27)297

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya agihan peruntukan pembangunan dan pelaksanaan projek pembangunan di peringkat negeri diberikan mengikut keutamaan dan keperluan Kerajaan Negeri. Berdasarkan pelan RMK-12, enam negeri kurang membangun akan terus diberi keutamaan dengan agihan sekurang-kurangnya 50% daripada keseluruhan peruntukan Perbelanjaan Pembangunan Asas Persekutuan. Namun begitu, terdapat beberapa projek yang diluluskan oleh Kerajaan Persekutuan tidak mengambil kira cadangan dan hasrat Kerajaan Negeri khususnya di Perlis untuk mempelbagaikan fungsi sesuatu projek sedangkan Kerajaan Negeri mempunyai dasar serta hala tuju yang telah mengambil kira pelbagai keperluan dan kehendak semasa serta pada masa hadapan. Misalnya, Projek Lencongan Banjir Barat Timah Tasoh yang telah dilaksanakan pada tahun 2015, di mana dalam pembinaan terowong banjir terdapat skop pembinaan pada item pencahayaan di dalam terowong berjumlah RM300 ribu. Namun, skop berkenaan telah dikeluarkan atas alasan penjimatan. JPS Perlis selaku pelaksana projek telah membangkitkan perkara ini supaya dikekalkan atas faktor keselamatan dan memudahkan kerja pemantauan serta penyelenggaraan di dalam terowong di masa hadapan. Akan tetapi, ianya masih tetap dikeluarkan daripada skop asal projek."

[Menteri Ekonomi]

20. PR-1523-U(27)298

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya mengkaji dan merancang satu inisiatif khas bagi memastikan setiap rakyat dan keluarga Malaysia terutamanya dari golongan B40 dan M40 mampu memiliki kediaman pertama dengan menyediakan rumah mampu milik berharga RM200,000 dan ke bawah baik di luar dan di dalam bandar. Kerajaan tidak boleh hanya memperkenalkan inisiatif yang hanya sekadar '*rebranding*' daripada Kerajaan sebelum ini kerana perubahan yang besar perlu dilakukan bagi mendepani kenaikan kos pembinaan disebabkan kenaikan harga barang binaan. Dasar Perumahan Negara (2018-2025) sendiri memperakui bahawa isu kemampuan memiliki rumah semakin ketara di kalangan rakyat dan impak kenaikan harga rumah yang mendadak turut dirasai golongan M40 selain B40. Inisiatif khas untuk menyediakan kemudahan rumah pertama pada harga di bawah RM200,000 dan ke bawah ini hendaklah dijadikan salah satu sasaran kajian semula Dasar Perumahan Negara dan memerlukan input dari pelbagai Agensi dan Kementerian serta pihak bukan Kerajaan dan bukan dari satu Kementerian sahaja. Isu kemampuan memiliki rumah pertama jika tidak ditangani akan mewujudkan generasi rakyat yang sentiasa menyewa tanpa mendapat peluang memiliki perumahan sendiri. Golongan generasi ini juga akan terus menjadi mangsa kepada harga hartanah yang melambung akibat spekulasi hartanah dan tanpa kawalan harga sehingga menjadikan harga di luar kemampuan sebenar golongan M40 dan B40."

[Perdana Menteri]

21. PR-1523-U(27)299

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan melaksanakan segera projek-projek tebatan banjir di seluruh negara untuk memastikan projek ini dilaksanakan secara holistik dan dapat mencari jalan penyelesaian kepada isu banjir yang semakin meruncing akibat kesan perubahan iklim dan pembangunan yang tidak mesra alam. Antara projek yang perlu dilaksanakan segera adalah seperti Projek Pembangunan Sungai Bersepadu (PLSB) Sungai Golok (KESBAN) dan Sungai Kelantan. Dengan pembinaan projek tersebut, risiko banjir besar dapat dikurangkan. Di samping itu, projek tebatan banjir di Selangor khususnya di Shah Alam dan bandar Kuala Lumpur juga diharapkan dapat dilaksanakan dengan komprehensif agar dapat menangani masalah banjir kilat."

[Menteri Sumber Asli, Alam Sekitar dan Perubahan Iklim]

22. PR-1523-U(27)300

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa supaya Kerajaan melaksanakan satu perancangan persediaan dan pengurusan risiko bagi menghadapi bencana alam dapat disemak semula akibat impak perubahan iklim yang sangat drastik sejak kebelakangan ini. Hal ini demikian kerana perancangan rapi penting bagi memastikan tahap kesiapsiagaan anggota terlibat berada di tahap yang tinggi. Di samping itu, Kerajaan juga perlu merencana satu langkah holistik bagi mendidik masyarakat agar bersiap siaga untuk menghadapi bencana alam kerana kesedaran terhadap isu ini di dalam kalangan masyarakat masih berada di tahap yang rendah berdasarkan peristiwa bencana alam yang lepas."

[Perdana Menteri]

23. PR-1523-U(27)301

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya membentuk satu pasukan petugas khas bagi memberi perhatian terhadap isu pencerobohan sempadan yang berlaku di Sabah dan Sarawak. Seperti di ketahui, Sabah dan Sarawak pula berkongsi sempadan darat sejauh 2,019.5km dengan Kalimantan, Indonesia. Daratan Negara Brunei Darussalam dibatasi sepenuhnya oleh Sarawak sepanjang 481.3km. Kebanyakan kawasan perbatasan Malaysia bersama negara-negara jirannya terletak di kawasan perbukitan yang diliputi hutan tebal dan kawasan perairan laut menyebabkan kawalan terhadap kawasan-kawasan ini sulit dilakukan. Oleh sebab itu, masalah pencerobohan, penyeludupan, pemerdagangan manusia dan perdagangan narkotik adalah antara isu yang saban tahun masih berlaku dan sukar ditumpaskan. Dengan siapnya Lebuhraya Sematan – Telok Melano juga baru-baru ini secara tidaklangsungnya meningkatkan risiko pencerobohan sempadan sama ada melalui darat dan laut terutamanya melalui Taman Negara Tanjong Datu. Oleh hal yang demikian, tindakan segera Kerajaan bagi mencari solusi terbaik kepada masalah kawalan sempadan ini adalah amat diharapkan."

[Menteri Dalam Negeri]

24. PR-1523-U(27)302

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya melaksanakan tindakan kawalan yang lebih ketat berkenaan jualan arak. Garis panduan yang khusus perlu dikaji dan diwujudkan oleh Kerajaan bagi mengawal penjualan arak yang meliputi waktu dan tempat jualan arak yang seragam dan boleh diguna pakai di seluruh negara bagi tujuan mengelakkan masalah sosial yang sering timbul seperti masalah rumah tangga dan kemalangan jalan raya. Oleh yang demikian, keseragaman tindakan daripada Kementerian Kewangan dan Pihak Berkuasa Tempatan (PBT) adalah amat diperlukan sekiranya ingin melaksanakan tindakan kawalan yang lebih ketat terhadap jualan arak kerana ketika ini ketidakseragaman tindakan antara dua entiti ini menjadi antara punca kawalan jualan arak tidak dapat dilaksanakan secara efektif dan efisien."

[Menteri Kewangan]

25. PR-1523-U(27)303

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan bersikap adil dalam mengamalkan kebebasan media di Malaysia. Kerajaan tidak seharusnya menjadikan Suruhanjaya Komunikasi Multimedia Malaysia (SKMM) sebagai alat politik untuk menyekat mana-mana isi kandungan media yang tidak '*pro*' Kerajaan atau tidak sependapat dengan Kerajaan. YAB Perdana Menteri yang memerintah Kerajaan pada masa ini telah berikrar dalam manifestonya untuk memastikan hak kebebasan bersuara dan melindungi kebebasan media. Namun, keadaan sebaliknya berlaku selepas beberapa bulan beliau membentuk Kerajaan. Lebih mendukacitakan, kebebasan media yang diwar-warkan Kerajaan hanyalah terhad kepada '*pro*' Kerajaan sahaja, manakala parti pembangkang secara halus dikenakan sekatan kepada akses media. Mana-mana media rasmi Kerajaan mahupun swasta tidak diberi kebenaran untuk menyiarkan berita mengenai parti pembangkang mahupun pihak yang menentang Kerajaan. Oleh demikian, Kerajaan digesa supaya berlaku adil dalam menyalurkan maklumat kepada rakyat. Tindakan ini adalah penting untuk memastikan hak kebebasan media tidak dicabul sewenang-wenangnya oleh pihak-pihak tertentu."

[Menteri Komunikasi dan Digital]

26. PR-1523-U(27)304

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya menyediakan perancangan, peruntukan dan prasarana kepada pelajar-pelajar universiti, kolej, STPM dan SPM bagi menghadapi kaedah pembelajaran alaf baru seperti pembelajaran dalam talian dan menggunakan media elektronik. Ini bagi membolehkan dan mendedahkan mereka ke alam teknologi siber dan e-pembelajaran yang semakin berkembang yang seterusnya memerlukan guru-guru yang terlatih dalam pendidikan alaf baru."

[Menteri Pendidikan]

27. PR-1523-U(27)305

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan mengkaji semula kawasan keluar dan masuk sempadan Malaysia-Thailand di Wang Kelian, Perlis. Sebelum ini, penduduk kedua-dua negara boleh menikmati kemudahan bergerak sehingga dua kilometer tanpa menggunakan pasport atau pas sempadan pada hari minggu. Kuatkuasa itu pernah dibuat bermula tahun 1993 hingga 2015. Akan tetapi, penarikan semula kemudahan kebebasan bergerak ini telah dibuat pada tahun 2015 kerana penemuan rangka manusia mangsa sindiket pemerdagangan manusia yang dipercayai etnik Rohingya. Susulan itu, Wang Kelian menjadi pekan mati hingga kini. Kerajaan Negeri Perlis cuba membangunkan semula kawasan pelancongan di Wang Kelian, namun ianya tidak semeriah dahulu. Justeru itu, Kerajaan diharapkan dapat mengkaji dan mempertimbangkan semula untuk memberi kemudahan bergerak di antara kedua-dua negara seperti sebelum ini. Dengan kemudahan tersebut, ianya akan dapat menjana semula perkembangan ekonomi khususnya buat penduduk tempatan yang sebelum ini amat rancak sebelum ditutup sepenuhnya pada tahun 2015. Semasa adanya '*Free Flow*' ini, Wang Kelian merupakan satu destinasi pelancongan yang amat meriah dan telah memberi ruang kepada peniaga-peniaga kecil di Perlis dan juga Selatan Thailand menambahkan pendapatan mereka."

[Menteri Dalam Negeri]

RISALAT-RISALAT YANG DIBAWA KE DALAM MESYUARAT
(DEWAN RAKYAT)

<u>TAHUN</u> <u>2023</u>	<u>RISALAT/DOKUMEN</u>	<u>TARIKH</u> <u>DIBENTANGKAN</u>
ST. 115	Laporan Tahunan dan Penyata Kewangan Lembaga Pertubuhan Peladang (LPP) Bagi Tahun 2021	12 Oktober 2023
ST. 150	Laporan Tahunan dan Penyata Kewangan Pihak Berkuasa Peranti Perubatan Bagi Tahun 2021	12 Oktober 2023
ST. 177	Laporan Tahunan dan Penyata Kewangan Lembaga Totalisator Malaysia (LTM) Bagi Tahun 2021	12 Oktober 2023
ST. 178	Laporan Tahunan dan Penyata Kewangan Universiti Malaysia Pahang Bagi Tahun 2022	12 Oktober 2023
ST. 179	Laporan Tahunan dan Penyata Kewangan Perbadanan Perusahaan Kecil dan Sederhana Malaysia (SMECorp) Bagi Tahun 2021	12 Oktober 2023
ST. 191	Laporan Tahunan dan Penyata Kewangan Lembaga Kemajuan Ikan Malaysia (LKIM) Bagi Tahun 2021	12 Oktober 2023
ST. 193	Laporan Tahunan dan Penyata Kewangan Perbadanan Tabung Pembangunan Kemahiran Bagi Tahun 2021	12 Oktober 2023
ST. 194	Laporan Tahunan dan Penyata Kewangan Lembaga Pembiayaan Perumahan Sektor Awam Bagi Tahun 2021	12 Oktober 2023

****UCAPAN-UCAPAN**
(PERATURAN MESYUARAT 17)
(KAMAR KHAS)

Tarikh Ucapan	Ahli Yang Berucap	Tajuk Ucapan	Menteri Yang Bertanggungjawab
1. 12.10.2023 (Khamis)	1. YB Datuk Seri Dr. Noraini Ahmad (Parit Sulong)	1. Isu Kekurangan Doktor Pakar dalam Negara	1. YB Menteri Kesihatan
2. 12.10.2023 (Khamis)	2. YB Datuk Seri Dr. Noraini Ahmad (Parit Sulong)	2. Status Projek Naik Taraf Kompleks Niaga Benteng Peserai	2. YB Menteri Pembangunan Kerajaan Tempatan
3. 12.10.2023 (Khamis)	3. YB Tuan Jamaludin bin Yahya (Pasir Salak)	3. Perumahan B40 di Kampung Gajah	3. YB Menteri Pembangunan Kerajaan Tempatan
4. 12.10.2023 (Khamis)	4. YB Tuan Jamaludin bin Yahya (Pasir Salak)	4. Pelancongan Sejarah di Sungai Manik	4. YB Menteri Pelancongan, Seni dan Budaya

**** Ucapan Di Bawah Usul Berkenaan Perkara Tadbir Kerajaan (Peraturan Mesyuarat 17)**